

LINGUISSIMO

VIVER IL RUMANTSCH, QUAI SAVAIN BE NUS RUMANTSCHS.

dad Annatina Dermont

Resguardar il rumantsch, quai san tuts. Propi mintgin, er il Talian, il Franzos u il Tudestg. Per resguardar il rumantsch na ston ins insumma betg savair discurren rumantsch u savair nua ch'ins discorra questa lingua. Premissa è sulet ch'ins enconuschia la lingua, e... d'avantatg fiss ina gronda purziun idealissem ed in tschuat daners. Viver il rumantsch, quai savain be nus Rumantschs.

Nua èn ils giuvenils Rumantschs al Linguissimo?

Al Linguissimo avevi dal tut, buns pau-nins, differentas turtas, giuvenils da lieunga taliana, franzosa e tudestga. Nagins giuvenils rumantschs. Persuenter bunas tschigulattinas, maila, paira e musica.

La concorrenza svizra da las linguas ha quest onn gè lieu senza nus. L'emprim hai jau pensà che nus n'hajan betg chapì il flyer, ma quai era in'idea fallada. Ils organisaturs han resguardà bain nossa lingua minoritara e publitgà tut en las quatter linguas naziunalas. Lura hai jau pensà che nus na possedian en num da Dieu betg giuvenils da 16–20 onns ch'èn interessads in zic al scriver...

Mabain... lura pia nagins Rumantschs interessads.

Ma, alura m'han els preschentà in giuvenot ch'els numnavan «il dretg Svizzer», cunquai ch'el sa discurren tut las quatter linguas. Rumantsch ha el emprendì supplementar-main. Sper bleras chaussas interrumschas è el s'interessà oravant tut per la giuventetgna rumantscha. Sia finamira dal Linguissimo era d'emprender d'enconuscher giuvenils rumantschs per pudair pratitgar la quarta lingua. El era in pau trumpà, ha dentant represchentà nossa minoritad cun anc dapli engaschi.

Donn e putgà, hai jau alura pensà...

Dentant suenter ch'jau hai fatg intginas intervistas cun ils participants n'eri nagut pli cun putgà. Jau er in pau gritta.

«Non pensavo di rincontrare dei Romanci, sai, non parlano più quella lingua. Il romancio è un dialetto italiano», raquintava ina Tessinaisa. «Où est-ce qu'on parle le romanche? Dans les Grisons? Ah, j'étais une fois à Scuol en vacances, mais je n'ai encore jamais vu un vrai Romanche...», manegiava la Francofona. «Red ma denn dass no i dr Schuel?»

Dumondas e dumondas, per il pli eri uschia ch'els han fatg in'intervista cun mai e betg jau cun els. Nua per il diavel èn quels participants rumantschs da la medema vegliadetgna che pudessan discutir e responder a las dumondas da quels giuvenils davart il rumantsch? Mussar a quels con viv ch'il rumantsch è anc e co nossa cultura è. Quai savain be nus Rumantschs, quel che ha emprendì rumantsch è qua surdumandà. Las opiniuns dals giuvenils na-rumantschs en dal tuttafatg giustifitgadas e tuppamain era betg vegnidadas revedidas u precisadas suenter quest Linguissimo.

Mirar sin la detta, enstagl d'agir...

Sch'il Linguissimo na fiss betg in'occurrenza da linguas, dubitass jau fitg ch'ils organisaturs fetschian danovamain la bregia da scriver il program en quatter linguas. Gia quest onn han els stritgà quasi bler rumantsch causa nagina participaziun.

Na mussa quest exempel betg che nus Rumantschs investin a moda fallada nossas capacitads da promoziun da la lingua? Na fissi betg meglier da motivar giuvenils da prender part a l'occurrenza enstagl da procurar ch'il flyer cuntegna intgins plects rumantschs? Na stuain nus betg dar adatg che nus n'emblidiam betg da viver il rumantsch enstagl da guardar trasora sin la detta als auters per vegnir resguardads?



La maisa cun il RM ha mancà causa nagina participaziun rumantscha.